

GESCHICHT

WELTBILLER

Antisemitismus - e Stéck Lëtzebuerg?

Renée Wagener

An de virtuelle Reseauen, mee och op der Strooss, gëtt een ewell nees mat antisemitische Spréch konfrontéiert. Dëse Beitrag analyséiert d'Weltanschauung, déi sech dohanner verstoppt, a geet op déi historesch Entwécklung vum Antisemitismus "made in Luxembourg" an.

D'Attentater, déi mer an de leschte Joren iwwert d'Medie materliefen hunn, haten zum Deel och ganz geziilt jiddesch Institutiounen oder Geschäfte am Viséier, wéi de jiddesche Musée zu Bréissel oder de Supermarché Hyper Cacher zu Paräis. Si si vu Leit ausgaangen, där hir antisemitesch Gewaltaktioun sech aus enger radikal-islamischer Weltsicht erginn huet. Et ass awer net sou, wéi wann antisemitisch Denken sech an Europa just an dëse Kreesser géif erëmfannen. An Däitschland gouf viru kuerzem e Reseau vun der sougenannter „Reichsbürgerbewegung“ opgedeckt, déi Uschlei souwuel op muslimesch wéi och op jiddesch Leit geplangt hat. Hei ass den Hannergrond e rietsradikalen.

Zu dësen zwee Beispiller kann ee soen, datt sech bei deene marginale Gruppierungen eng ënner anerem antisemitisch motivéiert, physisch Gewaltbereitschaft manifestéiert huet, déi bis zum Äusserste gaangen ass. Mee et gëtt och an der Mëtt vun eisen opgeklärten europäesche Gesellschaften nach ëmmer, oder schonn erëm nees?, Antisemitismus, net a physischer, mee a verbaler Form. Hei zwee méi rezent Lëtzebuerger Beispiller.

Virun e puer Méint huet eng Fra op Facebook an engem Kommentar an der Kleescherers-Affär geschriwwen: „Mir hunn eis Religioun, a gewësse Ministere si Judden oder Atheisten oder Famillen, déi Judde waren. Hunn näischt géint Judden. Firwat hunn si eppes géint ons?“ An d'Fra huet d'Fro gestallt, op et net „eis zwee héich Politiker“ wieren, déi de Kanter de Kleeschen an der Schoul wéilt verwieren.

Al Denkformen tauchen nees op

Zweet Beispill: Virun zwou Wochen hat Greenpeace eng Aktioun an der Stad zum Thema Ceta. Bei engem symbolesche Begriefnes vun der Demokratie gongen net nëmme sechs Persounen mat, déi de Sarg gedroen hunn, mee et wor nach eng weider Persoun präsent, e Mann, deen en Hutt mat zwou Trëtzen unhat, déi déi sougenannte „Pajess“ vun den orthodoxe Judde sollten duerstellen. Op d'Nofro vun engem Zeien hin, sot hien, hie wier e Rabbiner, de Frënd vum Rabbi Jacob. Hie géif dat internationalt Kapital representéieren. Den Aenzeien huet doropshin Plainte contre X gemaach an och bei Greenpeace intervenéiert. Greenpeace selwer huet de Mann op dem Zeie seng Interventioun hi gedoen, vun der Manifestatioun ze verschwannen, an e Statement formuléiert, an deem d'Organisatioun sech vun deem Betreffende senger Aktioun distanzéiert huet.

Sinn dat Harmlosegkeeten? Ech mengen net. A béide Beispiller ginn net nëmme Leit vun enger bestëmm-

ter Relioun verunglimpft, mee et ginn och déi Leit, déi der jiddescher Relioun oder Kultur ugehéieren, kollektiv a verierwbar Haltungen a Wiseszich ënnerstallt, an d'Judentum gëtt a Relatioun mat gesellschaftleche Fehlentwicklungen, oder dat, wat dofir gehale gëtt, gesat.

All dës Iddie sinn net nei. Et tauchen hei Denkformen erëm op, déi scho viru Joerzéngten zum Arsenal vum europäeschen Antisemitismus gehéiert hunn. Dat éischt Beispill vu Facebook erënnert a senger Argumentatioun staark un de chrëschtliche Antisemitismus vu virun engem Joerhonnert. Zënter 1848, also deem Zäitpunkt wou d'Press offiziell net méi zenséiert gouf, a bis zum Zweete Weltkrich wore besonnesch a kathouleschen Zeitungen ëmmer nees Duerstellungen ze fannen, an deene vun enger jiddescher Weltverschwörung Riets gong. D'Gläichstellung vun de jiddesche mat deenen anere Bierger, déi duerch déi franséisch Revolutioun zu enger Tatsaach gi wor, konnt och no Joerzéngten a bestëmmte kathoulesche Milieuen net akzeptéiert ginn. Et hätt bedeit, datt aner Reliounen an och den Atheismus mat der kathoulescher Konfessioun gesellschaftlech gläichgestallt gi wieren, an domat der Kierch hire Monopol duerchbrach gi wier, och wat d'Interpretatioun vun der Welt ugeet.

Mee déi jiddesch Leit sinn doriwwer eraus och méi generell als Vecteur vun enger Modernitéit ugesi ginn, déi ofgeleent gouf: d'Verschwonne vu chrëschtliche Traditionen, awer och d'Ofschafung vum Zunftsysteem duerch déi franséisch Revolutioun, déi d'Enn

vun enger Verflechtung vu Wirtschaft a kathoulescher Kierch bedeit huet, gouf hinnen ugelaascht. Beléift woren dobäi wirtschaftlech Verschwörungstheorien. So housch et am „Luxemburger Wort“ vum 6.11.1900, am Kontext vun der Dreyfus-Affär a Frankräich: „Ueberall wird die sozialistische Bewegung von den Juden begünstigt und steht die sozialistische Presse auf Seite der beschnittenen Millionenmauschler (...) Obwohl zerstreut in aller Herren Länder, streben doch die Juden der Erfüllung ihres Traumes von der Welt-Herrschaft zu.“ [1]

Verschwörungstheorien

D'Facebook-Beispill verréit och d'Virstellung, jiddesch Leit wiere per se géint chrëschtlech Leit. Woubäi et niewelaanscht gesot och eng zweifelhaft Pauschalisierung ass ze behaapten, wéi et an där Ausso geschitt, „mir“ - wien ëmmer dat soll sinn - hätten „eis Relioun“, sous-entendu déi, där de Kleeschen ugehéiert. An där Weltsicht ass jiddesch sinn awer och en negatiivt Merkmal, wat een an der Famill huet a weidergëtt. Antisemitisch Denke schléisst un un d'Virstellung vu verierwbaren, kollektiven Eegeschafte vu Volléker an Nationen, déi am 19. Joerhonnert besonnesch duerch de Sozialdarwinismus befeiert gouf. Dëst rassistescht Weltbild huet sech am Antisemitismus mat der Virstellung vun der Weltverschwörung verbonnen. 1932 gouf och am „Wort“ vun de „Rasseneigenschaften des Juden“ geschwat a gemengt: „Dem Judentum bangt um seine wirtschaftliche Hegemonie.“ [2]

Theorien iwwert eng jiddesch Weltverschwörung kommen an antisemiteschen Äusserungen ëmmer nees op. Besonnesch bekannt goufen déi sougenannt „Protokolle der Weisen von Zion“, eng Fälschung vum Ufank vum 20. Joerhonnert, déi aus Russland koom. Si gouf an der ganzer Welt verbreet an zirkuléiert och haut nach. Hei eng amerikanesch Versioun vun 1934.

Ähnlech Iddie vu Wirtschaftsverschwörung a vu kollektiven a verierwbaren negative Charakteristike gouf et awer och, wann och manner heefeg, op fortschrittlicher Säit. Am lénksliberalen „Tageblatt“ gouf 1923 vun engem „jüdischen Menschentypus“ geschriwwen, an dovun, datt „das Raffinement in Geldgeschäften zu einer erblichen Eigenschaft des Judentums wurde“. [3] A souguer an der kommunistescher Zeitung „Der Kampf“ konnt een 1921 Begrëffer wéi „Geldjude“ fannen. [4]

Dat zweet Beispill am Kontext vun der Greenpeace-Aktioun, an deem e Rabbiner, also de Representant vum reliéise Judentum, als Symbol fir dat „internationaalt Kapital“ steet, illustriert déi antisemitesch Virstellung vun enger jiddescher Verschwörung nach méi staark. Et ass bemierkenswäert, datt hei Bezuch op de Film „Rabbi Jacob“ vun 1973 geholl gëtt. Et kann ee sécherlech iwwer eng Rei vu Klischeeën an deem Film diskutieren, mee dee Film hat eng kloer opklärend Intentioun: Et goung grad drëm, déi gängeg chrëschtlech-westlech Stereotypen par rapport zu Judentum an Islam lächerlech ze maachen. De Schauspiller Louis de Funès, deen de Rabbi Jacob interpretéiert huet, huet herno an engem Interview gemengt: „Rabbi Jacob m'a soigné de mes idées antisémites“.


Et bleift d'Fro, wéi et méiglech ass, datt haut antisemitesch Stereotypen nees oder ëmmer nach an de Käpp vu verschiddene Leit gesechteren. Datt an dësen Zäiten esou Denkweisen nees offen zum Virschäi kommen, huet engersäits mat dem Phänomen

vun de soziale Reseauen ze dinn, déi verschidde Leit als eng Zort Staminet gesinn: Do kënnen se Iwwerzeugunge lassginn, déi se eigentlech net kënnen beleeden, a wou och alt mol verbal mat Béierglieser geworf gëtt. Dës zweifelhaft Form vu Sträitkultur schéngt sech hirersäits vu Facebook och nees zréck op di klassesch Effentlechkeet z'iwwerdroen. Ideologie mat rassisteschem, nationalisteschem oder och antisemiteschem Gehalt, déi Tabu gi woren, ginn elo nees oppen ausgeschwat.

Wéineg Sensibilitéit

Datt et Leit gëtt, déi esou Iddien haut nees wëllen no bausse bréngen, weist awer och op eng inhaltlech Opfräschung vun deenen alen Denkweisen hin. Den Antisemitismus ass net nëmmen e passionéiert Ofleene vu Leit, déi enger bestëmmter reliéiser Minoritéit ugehéieren. En dréit a sech zugläich d'Virstellung vun enger reliéis, kulturell respektiv ethnesch homogener Gesellschaft. Dës Virstellung bedeit zugläich Ausgrenzung vun deenen, déi d'Kritären net erfëllen. Sech antisemitesch ze äusseren, heescht och, sech zu dëser Gesellschaft dozou zerechnen, déi duerch Bedrohung vu baussen a Gefor ass. An deem Sënn ass en och, wéi d'Historikerin Shulamit Volkov et formuliert huet, e „kulturelle Code“, en Zeeche vun Zougehéieregkeet. [5]

Wat zu Lëtzebuerg opfällt, ass awer och, datt et net vill Sensibilitéit par rapport zu deem Sujet gëtt. Sou huet Greenpeace eréischt reagiert, no



QUELL: WIKI-COMMONS

deem Leit vu baussen d'Organisation op den antisemitesche Message vum betreffende Mann opmierksam gemaach huet. An hirem Statement huet si och just betount, si géif „derogatory or stereotypical mockery of any religious symbols“ veruerteelen. D'Iddi, datt e Rabbiner, also e Representant vun der jiddescher Reliounsgemeinschaft, fir dat „internationaalt Kapital“ géif stoen, geet awer iwwer eng ofschätzeg a stereotypiséiert Verspottung vu reliéise Symboler eraus, si dréckt d'Virstellung vun enger jiddescher Lobby aus, déi d'Fiedem vun der Weltwirtschaft géif zéien. Dorop geet Greenpeace net an.

Genee dëst Bild vun der Identitéit, oder weinstens der Relatioun vu Judentum an internationalem Kapital, geeschtert awer och an der fortschrittlicher Zee. An d'Duerstellung vun décke räiche Kapitalist mat der Zigar, deen d'Welt beherrscht, déi a ville Kapitalismus-kritesche Karikaturen optaucht, ass net ëmmer kloer ofgegrenzt vun där vum décke Judd mat der krommer Nues, deen d'Welt beherrscht. Et feelt och an de fortschrittlichen Organisationsen, déi

sech heefeg explizit fir Demokratie a géint Exklusivoun ausdrécken, oft un engem kritesche Bléck op di eegen Denkweisen a Stereotypen.

Dëse Bäitrag gouf den Donneschdeg, 2. Februar an der Rubrik „D'Zäithistorikerin“ vu „radio 100komma7“ iwwerdroen.

Quellen:

- [1] Der Sozialismus - eine jüdische Bewegung, in: Luxemburger Wort, 6.11.1900, S. 2.
- [2] Eine jüdische Internationale, in: Luxemburger Wort, 14.09.1932, S. 3.
- [3] Die Judenhetze und ihre Ursachen, in: Tageblatt, 12.06.1923, S. 3.
- [4] Junius: Es wäre so weit!, in: Der Kampf: Wochenschrift der Kommunisten Luxemburgs, 1, (17.02.1921) 14, Beilage, S. 4.
- [5] Volkov, Shulamit: Antisemitismus als kultureller Code, in: Jüdisches Leben und Antisemitismus im 19. und 20. Jahrhundert. Zehn Essays, München 1990, S. 13-36.